

**A bécéiuhe tii te Paulo**  
**nge céii lépwo**  
**Tésalonik**  
**Atabuhi ko a tii**

*Woo na e tii a tii ce?*

Wo Paulo, pa apostolo. Lu mu pelen wo Timoté me Silas.

*E tii éniile?*

Ha awieme a jo 49 me 52, ha a béalohe bwo engen de Paulo, he lé mu ha a pwomwo ubwo Korénit me Timoté me Silas. (Omehi *Apostolo* 18.1 me 18.5.)

*E tii me dee?*

Me de ni acéihi ne Tésalonik, a pwomwo ubwo ha amu Grèce, a céiu duaan ko a province Macédoine, ha a benaamwon na lé pihuô nelang wo lépwo Roma. E pipatemehi nelang a Pwooti Wâé wo Paulo he na cié ni naadenitan, ânebuhe a bwo cela ten ko lépwona lé cubwonieng (*Apostolo* 17.1–10). Kehe icehi ana hiwon lépwona lé céihi mu ko a pwooti ten, ke e tii a tii ce, wieli céiu jo alecehen, beme e pamwoiuihi ni céihi telé na mwo coho.

*É ko ade na e tii?*

É he e tabuhi a puco te ni acéihi ne Tésalonik wo Paulo, ke time uce wâé te ni béé Juif a pwooti na e pipatemehi, ke lé pawieeng mu ha a pwomwo ubwo. (Omehi *Apostolo* 17.1–9.) E tii me de lépwo acéihi na élé lang, beme e pamwoiulé ke pacémunilé.

*Ade ace âne a tii ce?*

E pipwodéén wo Paulo ko ati ni naado na wâé, ne ha a mulihe ni acéihi. Ke e pamwoiulé, beme lé piwéden koja ni gia me tacebwén. Ke e pacémunilé ko a bwo mulie telé, me lé ucéihi a bwo mwojuia mwobé te Padaame Iésu. Be wo lépwo béén mu kolé, ke caa tabuhi pinekepé ne telé ko aceli e o tuie ne ko lépwo acéihi na lé mele ânebuhe a bwo mwojuia mwobé te Iésu. Ke é mu ko ana lé céihi pie caa e mwonu a bwo mwojuia mwobé te Padaame, ke wo lépwo béén mwo, ke lé niimihi pie, wâé heme lé mulie hauli, ke me lé pwoemaan.

**A bwomune a tii 1 Tésalonik**

Pipwobwocu (1.1)

A mulie na wâé ne pele lépwo Tésalonik (1.2–10)

A penem de Paulo ne Tésalonik (2.1—3.13)

A mulie na wâé te Padué (4.1–12)

A bwo mwojuia cemwo te Padaame (4.13—5.11)

Bénebwéne pwooti ke a bépinelé (5.12–28)

*Pipwobwocu*

<sup>1</sup>Woéo\* Paulo na é pwotii, he wogeme me Silas† me Timoté.É pwotii lé céikewé, ni acéihi ne ha a pwomwo ubwo Tésalonik, na geé mu ko Padué Caa tenye, me Padaame Iésu \*Kériso.

Wâé heme e mu kowé a \*pipwoééhe tice ja kon, me a péém. Adéikewé!

*A mulie na wâé @ ne pele lépwo Tésalonik*

---

**1:1 1.1** Apostolo 17.1–9 \* **1:1 1.1** Woéo—Grek: *Wogeme*. Wo Paulo na e pwotii, kehe icehi ana e habwii pie céiu pwonimelé me Timoté me Silas he lu mu pelen. † **1:1 1.1** Silas—A niin, ke *Silvain* he pwo *latin*, ke *Silas* he pwo grek. Omehi Apostolo 17.1.

2-3 Geme te cuwo ko pipwo-olé te Padué Caa, heme geme pwoiitihi me dewé. Geme pipwo-olé ten ko ati ni penem na geé pwo, ne ha a céihi me a pipwoééhe tewé. Ke geme pipwo-olé ten mwo ko a bwo cumang dewé, be geé ucéihi ne he ni céihi tewé [a bwo mwojuia mwobé te] Padaame Iésu Kériso.

<sup>4</sup> Lépwó bééme ne ko Kériso, geme te temehi pie, e pipwoééhewé wo Padué, ke e pipégalikewé, beme geé apulie ten.

### *Geé pipwohewiikeme*

<sup>5</sup> He li geme pii beetihi tewé a \*Pwooti Wâé te Iésu, ke time geme uce ju pii tewé ko pwocihe cehi; kehe geme pipatemehi tewé ko a junuu a \*Jenen Iitihi. Geme céihi pie, a pwooti teme, ke a juuju. Ke geé temehi ehi a muliheme ne pelewé, me a bwo picani teme tewé.

<sup>6</sup> Ke wogewé, ke geé âcehi a bwo mulie teme me a bwo mulie te Padaame. Be geé caa hegi a pwooti, ne he ni tacebwén na ubwo. Kehe icehi ana a Jenen Iitihi, ke e ne tewé a pipwodéén na te junihe ubwo.

<sup>7</sup> Ke geé caa béhabwiinen de ni acéihi, ati ne he lupwo province Macédoine, me Akaï‡.

<sup>8</sup> Be a pwooti te Padaame, na e engen mu pelewé, ke genye téne a één pitihii a Macédoine, me a Akaï [pwohewii a tikekele]. Ke ati ni apulie lang, ke lé temehi pie, geé céihi ne ko Padué.

Te tice pwooti celi jan me geme pii.

---

1:2-3 1.3 1 Korénit 13.13; Kolosé 1.4-6      1:5 1.5 1 Korénit 2.4-5  
1:6 1.6 Apostolo 17.5-9    ‡ 1:7 1.7 Akaï—Ha amu Grèce jena.

<sup>9</sup> Be, me lé pwojepule kome, ke lé te piuti mwo a bwo hegikeme tewé, ne pelewé. Ke lé pii pie, geé caa bitekewé nge céii Padué. Ke geé necu ni \*dème duée, beme geé pipaunu, me piténede Padué na e mulip, ke juuju.

<sup>10</sup> Ke lé piuti ngen pie, geé \*ucéihi ne ha a céihi, pa Naîn Iésu Kériso, na e bo mwojuia mwobé, mu he \*miiden. Be e caa mulie cemwo mu ha amele, ke e celuimikenye mu ha a kuhinaado ko ni ta: a kuhinaado na e bo ne te ni apulie wo Padué, ne ha a okée ten.

## 2

### *A penem de Paulo ne Tésalonik*

<sup>1</sup> Geé te temehi, wogewé mwo ni bééme acéihi, pie a bwo mu teme pelewé, ke time uce pitice-naado ne kon.

<sup>2</sup> É he li game mu Filipi, ke game mu he ni picani, ke lé téétikeme, ke lé pijeta kome, me pwohewii ana geé temehi. Kehe icehi ana wo Padué, ke e pamwoiukeme, beme game pate-mehi tewé a Pwooti Wâé ten, ne ha awieme ni tacebwén.

<sup>3</sup> Be ana game cihe kon, ke time e uce cuwo pwo a gele, ai é ne pwo ni naado na time uce wâé, ai é ne ha a pipwohuô.

<sup>4</sup> Kehe wo Padué, ke e niimihi pie wâé heme e ne teme a Pwooti Wâé, me game cihe, time uce a bwopwonen beme lé piwâékeme wo lépwo apulie, kehe me de Padué na e alihi bwoluhî ni pwonimeme.

<sup>5</sup> Geé te temehi pie, time geme mu uce téele cihe me geme pihaami ni apulie. Ana nimeme kon, ke time uce aceli me geme pé ce mwani kon. Wo Padué, ke e te alihi ni pwonimeme.

<sup>6</sup> Ke time geme uce hane \*a wâé na e âbé mu ko ni apulie, ai é mu kowé, ai é mu ko ce béén.

<sup>7</sup> Kehe wogeme lépwo \*apostolo te Kériso, hemepie nimeme, ke geme o huôhi ne huîiwé. Kehe é he li geme mu pelewé, ke te ju bwala geme, pwohewii ê nyaa te ewa na e cile ehi ni naîn.

<sup>8</sup> É mu ko a bwo wâé geme ne kowé, geme caa piwâam beme geme ne tewé, time uce a Pwooti Wâé cehi te Padué, kehe ni muliheme mwo. Be te junihe ubwo a pwonimeme kowé.

<sup>9</sup> Wogewé ni bééme, geé teko piniimihi ni bwo penem deme, ke ni bwo mwaale geme. Geme penem bwén ke pwang, beme te tice celi gia gewé kon. Ke wonaa a bwo patemehi nen dewé a Pwooti Wâé te Padué.

### *A bwopemikeme ne pelewé ke wâé*

<sup>10</sup> Wogewé lépwo \*apajujuhi nen, ke wo Padué mwo, pie a bwopemikeme ne pelewé, wogewé lépwo acéihi, ke mwomwon, ke juuju, ke te tice celi me tautikeme kon.

<sup>11</sup> Geé te temehi mwo pie, muko pétaapwo wogewé, ke geme pwohewii pa caa te ewa ne ko ni naîn me dewé.

<sup>12</sup> Geme ne tewé ni pune, beme be pamwoiukewé. Geme wâgo kowé me geé mulie pwohewii ana nime Padué kon, weeng Pana e

todekewé me geé taa ha a Mwametau ten, beme geé mu pelen ne ha a bwo ubwo na a wâé ten.

*Geé caa hegi ehi a pwooti te Padué*

<sup>13</sup> Geme te pipwo-olé te Padué, be li geé hegi a pwooti ten he li geme patemehi, time uce pwohewii a pwooti te ni apulie, kehe a pwooti te Padué na e penem kowé, wogewé na geé céihi.

<sup>14</sup> Be wogewé ni bééme, geé pipwohewii ni acéihi\* ne ko Padué ne \*Judé, na élé he Kériso Iésu. Be wogewé mwo, ke geé mu he ni picani mu ko lépwo bééwé mu ha amu tewé, pwohewii ni acéihi na lé mu he ni picani mu ko lépwo âjiénelé juif,

<sup>15</sup> na lé pwo me e mele wo Padaame Iésu, me lépwo \*péroféta. Ke lé pwotahinaado ne kome, ke lé tééti ni apulie!

Ke wo Padué, ke muhi ten kolé.

<sup>16</sup> Nimelé me lé pwo me time geme cihe te lépwona time uce lépwo \*Juif ko a pwooti na me e celuimilé. Ke lé bwo nihe pwo kuti nina ta. É mu ko anaa, ke wo Padué, ke e bo tautilé, ke e bo pwocuhinaado telé†.

*Nimung me é alikewé mwo*

<sup>17</sup> Mepwo é ne kome, wogewé lépwo bééme, alecehe a bwo pipiiden denye lépwo apulie ha a céiu benaamwon‡, ke time nye uce pialikenye, kehe te wogewé he ni pwonimeme! Ke geme

---

**2:13 2.13** 2 Tésalonik 2.13      **2:14 2.14** Apostolo 17.5      \* **2:14 2.14** Ni acéihi—Grek: *Églises*.      **2:15 2.15** Apostolo 9.23,29, 13.45,50, 14.2,5,19      † **2:16 2.16** Dernière phrase—Grek: *Kehe icehi ana o caa mu kolé a pwo-okéé*.      ‡ **2:17 2.17—2.18** Lu engen mu Tésalonik wo Paulo me Silas, beme lu cela ko lépwona lé cubwonilu. Omehi Apostolo 17.10.

hane me geme alikewé mwo, be geme te junihe niimikewé.

<sup>18</sup> Ke nimeme mwo me geme âdé die pelewé, te woéo Paulo, pa bécéiuhén; kehe wo \*Caatana, ke e pwo me time geme uce âdé.

<sup>19-20</sup> Nihe wâé teme gewé, ke geme pipwodéén kowé. Ke é mu kowé na geme ucéihi a tan na e bo mwojuia mwobé wo Padaame henye Iésu Kériso. Be, é ha a tan naa, ke o wogewé na geé o cememe, pwohewii ana ne te lépwona lé piwéden.

### 3

#### *Geme pahede Timoté lé céiikewé*

<sup>1</sup> Caa time geme uce ucéihi, geme niimihi pie wâé heme gemu te pimu cehi éni Atène,

<sup>2</sup> ke gemu\* ne lé pa béému Timoté, pa eabwé te Padué, ke pa béému ko penem, ko a bwo patemehi na a Pwooti Wâé te Iésu Kériso, beme e paûmiêhi, ke pamwoiukewé ne he ni céihi tewé,

<sup>3</sup> beme te tice paceli me pihauli nang ne he ni tacebwén jena.

Be geé te temehi pie é lang he na nime Padué me nye â die lang.

<sup>4</sup> É he geme mwo mu pelewé, ke geme pii tewé ânebun pie, genye bo mu he ce picani celi ubwo; ke anaa, ke e caa tehenebé, geé teko temehi.

#### *E pii me wâé gewé*

<sup>5</sup> É mu ko anaa, ke é caa ne lé Timoté, be time uce nimung me é tee uca, kehe nimung me é alihi

---

**2:19-20 2.19** Filipi 2.15-16, 4.1; 2 Tésalonik 1.4    **3:1 3.1** Apostolo  
 17.15    **3:2 3.2** Apostolo 16.1-3    \* **3:2 3.2** *Gemu*—Paulo me Silas.  
**3:3 3.3** 2 Timoté 3.12

ace bwo engen dewé ne ha a céihi. Be mwotiéo pie pa atacebwénikenye, ke e caa tacebwénikewé, ke wieli geme penem me te ju piticenaado ne kon.

<sup>6</sup> Kehe wo Timoté, ke e mwo ju tehenebé mu pelewé, ke e ne teme ni jepule wâé mu ko a céihi tewé, ke a pwonimewé ne ko Padué. E pii teme pie, geé teko pipaniimikeme, ke nimewé me geé alikeme mwo, pwohewii ne kome mwo.

<sup>7-8</sup> É mu ko anaa, ke wogewé ni bééme, é ne ha awieme ni tacebwén, me ni picani, ke te junihe pamwoiukeme a céihi tewé, be geé teko cumang ne he Padaame.

<sup>9</sup> Ade ace bépipwo-olé celi me geme ne te Padué, é ne kowé, mu ko a bwo piwâénimeme kowé ne ânebuhe Padué?

<sup>10</sup> Bwén ke pwang, geme ileeng ne he ni ju pwonimeme, beme e ne teme beme geme alikewé mwo, ke me geme ne behi nina tieden he ni céihi tewé, beme jéhin.

### *É pwoitithi me dewé*

<sup>11</sup> Ke me weeng Padué Caa tenye, ke Padaame henye Iésu Kériso, ke me lu tehi ace pwaaden die pelewé!

<sup>12</sup> Ke wo Padaame, ke me e pwo me ubwo a bwo eânimen dewé me de ni bééwé, ke me de mwo ati ni apulie, pwohewii a bwo eânimeme tewé.

<sup>13</sup> Ke me e pwo me mang ni pwonimewé, ke me te tice celi me pipé ne kon, é ne ha a bwo pipaciitikewé, ne ânebuhe Padué Caa tenye, heme



e bo âbé wo Padaame henye Iésu me ati ni apulie iitihi ten.

## 4

### *A mulie na wâé te Padué*

<sup>1</sup> Lépwò bééng ne he Kériso, geme panebwénihi [ne ha a bwo niimihi nen ce]: Geme caa pacémunikewé ko a mulie na wâé te Padué, ke geé caa mulie hen. Ke é jena ni, ke geme cuwokowé, ne he nii Padaame Iésu, pie, me geé pwo celi piwéden.

<sup>2</sup> Be geé caa te temehi li pihuô li geme caa ne tewé, ne he niin.

<sup>3</sup> Wo Padué, ke nimen me geé mulie ne ha a mulie na wâé ten, ha ati ni bwomunen.

Ke geé nemwo pule imi ni apulie hauli.

<sup>4</sup> Go wéihi ehi a éém\*, beme go iitihi, ke me wâé go, ne he pwahamii Padué.

<sup>5</sup> Go nemwo pwo me céiko nina te nimem kon na ta, pwohewii lépwona time lé uce temehi Padué.

<sup>6</sup> Go nemwo pipwohuô te pa acéihi béém, ke me go pule imi é mwoden†.

Wo Padué, ke e pwocuhinaado te lépwona lé wonaa, pwohewii a bwopiinen na geme caa mi pii tewé.

<sup>7</sup> Be time e uce todekenye, beme nye mulie hauli. Kehe e todekenye beme nye mulie me den.

---

**4:3 4.3** 1 Tésalonik 5.23; 1 Péteru 1.16      **4:4 4.4-5** 1 Korénit 6.13

\* **4:4.4** *Go wéihi ehi a éém*—ai *Go wéi me paciiti é mwodem*. † **4:6 4.6** *Pipwohuô...me go pule imi é mwoden*—ai *Pipwohuô ne he ni âicu tem*.      **4:7 4.7** 1 Péteru 1.15-16

<sup>8</sup> Ke wo pana e tahi taabwon a pwooti naa, ke time e uce tahi taabwon ni pihuô te ni apulie, kehe e tahi taabwoni Padué, Pana e ne tewé a \*Jenen Iitih ten.

*Pwo me piubwo da a bwo pieânimewé tewé*

<sup>9</sup> Mepwo é ne ko a bwo pieânimewé tewé, ke te tice aceli me é pii tewé ne kon. Be geé caa te temehi, mu ko Padué, a bwo eânime ni bééwé ne ko Kériso.

<sup>10</sup> Ke [game temehi pie] te junihe ubwo a bwo eânimewé te lépwo acéihi na ati ha a Macédoine. Ke game pii tewé pie, wâé heme geé junihe pwo celi piwéden.

<sup>11</sup> Geé hane me geé mulie ha a péém me ni béén. Ke geé nemwo pwo me ânenimewé ko ce bwomu te pace céiu. Kehe geé penem ehi, pwohewii a bwo îlehi nen deme kojakewé. <sup>12</sup> Ke me wonaa, ke wo lépwna time uce lépwo acéihi, ke lé paunuhi a bwo mulie tewé. Be o time geé uce wiinaado tête nge he ni pwomwo‡.

*A bwo mwojuia cemwo te Padaame*

*Lé o bo mulie mwo ne ni amele*

<sup>13</sup> Lépwô bééng ne he Kériso, nimeme me geé temehi ana e o tuie ne ko lépwo a[céihi na lé caa] mele. Beme o time uce piwahin gewé, pwohewii lépwna time uce lépwo acéihi.

<sup>14</sup> Be genye céihi pie, e mele wo Iésu, ke e mulie cemwo mu ha amele. Ke é nelang he na game

---

**4:8 4.8** Luka 10.16; 2 Korénit 1.22    **4:9 4.9** Ioane 13.34    **4:11 4.11** Éféso 4.28    ‡ **4:12 4.12** 2<sup>e</sup> phrase—ai *Beme te tice ace céiu naado celi tieden kojakewé.*    **4:14 4.14** Roma 14.9; 1 Korénit 15.3–4,12

temehi pie, é heme e mele wo pa acéihi ne kon, ke wo Padué, ke e pwo me e mulie cemwo<sup>§</sup>, mu ko Iésu.

<sup>15</sup> Éa, weengi a pwooti te Padaame na geme pii tewé: É ha a tan na e bo mwojuia mwobé wo Padaame, ke ni apulie ten na lé caa mele, ke [lé o bo mulie cemwo mu ha amele, ke lé o tooeng. Ke] o time lé o uce ucéikenye lépwona nye mwo mulie.

<sup>16</sup> É ha a tan naa, ke genye bo téne ce pwowiikau celi ubwo: a pati pa daame he ni \*âcélo, me a éé a tutu te Padué. Ke wo Padaame, ke e bo opé, mu he miiden. Ke wo lépwona lé céihi ne kon na lé caa mele, ke lé mi cuwoda mu ha amele.

<sup>17</sup> Ke é alecehen, ke wogenye lépwona nye mwo mulie, ke o tai céikenye da ibu me woélé, da he ni nii, da céii Padaame, ke o pitapitikenye me weeng. Ke genye o bo pimu ibu me Padaame dieli mwo.

<sup>18</sup> Geé pipamwoiukewé ko a pwooti naa!

## 5

### *Patéeti lépwo apulie*

<sup>1</sup> Time geme uce tii ace benaamwon, ke ace tan celi e bo tuie hen wo Padaame.

<sup>2</sup> Be géé caa te temehi ehi pie, e mwojuia mwobé, pwohewii pa abune heme e âbé he bwén. [Be time lé o uce ucéieng wo lépwo apulie.]

<sup>3</sup> Be lé o niimihi pie, lé caa mulie ha a péém, ke o wâé ne kolé ati. Kehe icehi ana o patéetilé a tan

---

§ 4:14 4.14 E pwo me e mulie cemwo—Grek: E pééng bé. 4:15 4.15–16 1 Korénit 15.51–52 5:2 5.2 Mataio 24.42–43; 2 Pétéru 3.10; Pii Beetihi 3.3 5:3 5.3 Mataio 24.39; Luka 21.34–35

naa, pwohewii a bwo cunu ê toomwo na e piâbeele ewa. Ke o time uce jan me lé cela.

<sup>4</sup> Ke mepwo é ne kowé, ni acéihi bééng ne ko Kériso, ke time geé uce mulie ne ha a melepiing. Ke time geé o uce téetihî a tan naa, na e tuie pwohewii pa abune.

<sup>5</sup> Be wogewé ni apulie ha a pwéélang, be wogewé ni apenem heme pwang. Kehe time genye uce mu ha a melepiing.

*Genye tee ûmiê*

<sup>6</sup> Genye nemwo pule pwohewii lépwo béén, kehe genye tee ûmiê, ke nye wéa, ke pipwocilekenye.

<sup>7</sup> Be a bwén, ke a de lépwona lé pule, me lépwona lé piolo.

<sup>8</sup> [É pii mwo pie]: Wogenye, ke lépwo apulie ha a pwéélang. Ke genye wéa, ke pipwocilekenye. Genye pé a céihi, me a bwo pieâtime beme epwén ko pa. Genye pé me boonye a bwo mwomwohi nen pie caa celuimikenye.

<sup>9</sup> Wo Padué, ke time e uce todekenye me e pwocuhinaado tenye, kehe me e celuimikenye, na e pwaadeniin bé wo Padaame henye, Iésu Kériso.

<sup>10</sup> Be wo Iésu, ke e caa mele me denye, beme genye o pimulie ibu me weeng, [hemepie genye caa mele, ai hemepie nye mwo te mulie; ke] mepie genye teko pule, ai é hemepie nye teko ûmiê; ha ace tan celi e o bo mwojuia mwobé hen.

<sup>11</sup> É mulang, he na wâé heme geé te cuwo ko picani tewé, me pipamwoiukewé, pwohewii ana geé caa teko pwo.

*Bénebwéne pwooti*

<sup>12</sup> Lépwo bééme ne he Kériso, geme ilekewé pie, me geé pipaunu lépwo apihuô tewé ne ha a céihi na e nelé wo Padaame me lé pwopune tewé, ke pacémunikewé.

<sup>13</sup> Geé paciitilé, ke geé pipwoééhelé ne ko nina lé pwo ati ne kowé. Ke geé mulie ha a péém me lépwo bééwé.

<sup>14</sup> Geé cihe me mwoiu ne ko ni apwoemaan\*, ke geé pamwoiu nina piwâ jélé [me lé penem de Padué] ke geé picani te nina tice niíhelé, ke geé picani ne kolé ati.

<sup>15</sup> Geé pipwocile, geé nemwo pwotacu ko a ta, ko ana ta. Kehe geé hane me geé te cuwo ko pipwo tewé nina wâé. Ke geé wonaa mwo te ati ni apulie.

<sup>16</sup> Geé te cuwo ko pipwodéén,

<sup>17</sup> geé te cuwo ko pwoiitihi,

<sup>18</sup> ke geé te cuwo ko pipwo-olé te Padué, heme wâé ai, é heme ta ne kowé. Be weengaa kuti, ana nimen me geé pwo, wogewé nina caa céiu gewé me Kériso Iésu.

<sup>19</sup> Geé nemwo pacuwohi a \*Jenen Iitihí heme e penem.

<sup>20</sup> Ke geé nemwo pwo me piticenaado ne ko ni pwooti na lé pébé wo lépwo péroféta ne he nii Padué.

<sup>21</sup> Geé omehi ati me pineitééhi nina wâé koja nina ta. Ke geé cile cehi nina wâé,

<sup>22</sup> ke geé â ité koja nina ta.

---

**5:14 5.14** 2 Tésalonik 3.6,11      \* **5:14 5.14** Lépwo apwoemaan—ai Lépwo na time lé uce pipwoiipilé.      **5:15 5.15** Roma 12.17; 1 Pétéru 3.9      **5:16 5.16** Filipi 4.4      **5:18 5.18** Éféso 5.20      **5:19 5.19** Éféso 4.30      **5:21 5.21–22** 1 Ioane 4.1

*Bépinelé*

<sup>23</sup> Geme ilehi koja Padué, Pana e ne a péém, pie, me e pwo me geé iitihi, ke me geé mulie me den cehi. Ke me e wéihi dieli mwo ati ni mulihewé: ni jenewé, me ni pwonimewé, me ni bwo niimihinaado tewé, me ni ééwé. Ke, é ha ace tan celi e o mwojuia mwobé hen wo Padaame henye Iésu Kériso, ke o te tice ta kowé celi me tautikewé kon.

<sup>24</sup> Be wo Padué na e caa todekewé, ke e caa te cuwo pwo ana e pii, ke e bo te tai pacuwohi ati ninaa.

<sup>25</sup> Ke geé pwoiitihi me deme mwo, wogewé lépwo bééme ne he Kériso.

<sup>26</sup> Geé pipwobwocu mu he ni ju pwonimewé te ati ni béénye acéihi ne ko Kériso.

<sup>27</sup> Ke é ilehi kojakewé, ne he nii Padaame pie, me geé bo pine a tii ce, te ati ni acéihi.

<sup>28</sup> Wâé heme e mu pelewé a \*pipwoééhe tice ja kon de Padaame henye Iésu Kériso!

Adéikewé!

**Tii Iitihi: Élele Iitihi na mwo Coho  
Cemuhi: Tii Iitihi: Élele Iitihi na mwo Coho (New  
Testament)  
Nouveau Testament Cemuhi**

copyright © 2017-2018 Wycliffe Bible Translators, Inc.

Language: Cemuhi

Contributor: Wycliffe Bible Translators, Inc.

Nouveau Testament en cemuhi

All rights reserved.

2025-04-30

---

PDF generated using Haiola and XeLaTeX on 29 Apr 2025 from source files  
dated 30 Apr 2025

f8ee0ae8-19d4-5493-b0f2-3132fc194785